

է միայն երկրագործութեան: Ասածներէս թող ապացոյց լինի այն, որ Բագու-Թիֆլիզեան երկաթուղու գիծը բացուելուն պէս Ղարաբաղի, Շամախու, Թիֆլիզի, Փանձակի, Երևանի և ուրիշ տեղերի գիւղացիք վազեցին Բագու, շուտով հարստանալու և միլիօնների տէր դառնալու պատրանքով: Կարճ խօսքով՝ Կովկասի զանազան անկիւններից հազարաւոր ու բիւրաւոր Հայ ընտանիքներ թողնելով իրենց հայրենի աշխարհը, իրենց պապական անդիւ պարապմունքները, հետըզհետէ գաղթեցին Անգրկասպեան երկրներից սկսած, մինչև լայնածաւալ Ռուսիայի ամենահեռաւոր ծայրերը: Այն ինչ Ուտիացիները՝ Բագուին շատ մօտիկ լինելով հանդերձ նրանցից ոչ ոք չչարժուեց իւր տեղից և ոչ ոք դէս ու դէն ընկած չթափառեց և երբէք էլ չի թափառի, քանի որ Ուտիացիների սիրտն ու հոգին ամուր կապուած է իւր աշխարհի օդի ու ջրի, նրա պտղաբեր հողի և նուիրական սրբավայրերի հետ, քանի որ նրա ուշքն ու միտքը, լարուած ու կենդրոնացած է յատկապէս միմիայն երկրագործութեան վրայ, որից դուրս նա իւր գոյութիւնը վտանգուած է համարում:

Փորձի համար Ուտիացի Հային պատմեցէք աշխարհիս զանազան մասերի մի քանի գեղեցիկ վայրերի և սքանչելի տեղերի գոյութեան մասին. նա երբէք չի հաւատայ ձեր ասած խօսքերին, վասնզի նրա կարծիքով ու համոզմունքով Ուտիացոց աշխարհից լաւ երկիր ուրիշ ոչ մի տեղ չի լինիլ ամբողջ աշխարհիս վրայ: Փորձելու հա-